



₹ 5/

# तुबारि

www.pangi.in

अब अंग्रेजी, हिन्दी त  
पंगवाड़ी भाषा अन्तर असी।

Issue 85; April 2019

## बिषय सूची

नउआं जमाना, अजब जमाना	1
शाम सिंहे कोशिश	2
अन्हा घोड़ा	2
ब्याह अन्तर लेहर त अणबण	3
कतो खरे असे, से मेहणु?	3
धिरुभाई अम्बानी	4

## खास दन

14 अप्रैल - लिशु धनीस

19 अप्रैल - शुभ शुक्रवार

21 अप्रैल - अठ भारो, ईष्टर

28 अप्रैल - पंडर भारो

## धाणि त तसे जुएली

केआं अब सते बंटी  
अठ फेरे लवाण  
चाहिए। सत फेरे



तेके व्याहे, आठु जे फेरा असा,  
से कुई जे लवाण चाहिए कि से  
कुई बचान्ते त तेस पढान्ते ।

## नउआं जमाना, अजब जमाना

हैं गीहे उंचाई त सुआ मोटीण लगो असे,

पर हैं दिल छोटे भुण लगो असे।

सड़क बुली भो असी, पर हैं हेरण तारीके सेंकड़ीते गओ असे।

सुआ फजूल खर्चे करण लगो असे, महेणु तोड बी नेई रजो।

हैं गी मोटीण लगो असु, पर हैं पाबर मठणीता गओ असी।

सुख सुविधा बेधती गओ असी, तोउं बी टेम नेई महेणु कें।

असी कें डिग्री सुआ भो असी, पर हैं धीरा मुकता गओ असा।

दुवाई त सुआ बटणते गओ असी, पर सहदेद मुकती गओ असी।

हैं धन दोलत बधती गओ असा, पर मुल कम भुंता गओ असा।

अस बोके सुआ, प्रेम घट त नफरत सुआ करण लगो असे।

असी पेट भरण त शीच छड, पर जिंदगी जीण न शीची।

असी जीवने साल त बधाई छडी,

पर ए साल जीवने बड़ ना भर बटी लिया।

असी जोसण तकर घेणे बथ त बणई छड, पर अपु गीहे भेएड अओ तेस  
नोए डेरुआ जोई बोक करण हेर किस डरते ?

असी संसार बठ त काबु कइ छा,

पर अपु इच्छा वश अन्तर ना कइ बटी।

असी हवा त साफ की, पर अपु आत्मा त साफ ना कइ बटी।

हैं अमदाण त बधी, पर असी अन्तर ईमानदारी घटती गओ असी।

ई जमना भो शेट महेणु के, पर खरे महेणु के ना भो।

सुआ खांजी के, पर तेन्ही अन्तर कोई गुण नेई।

की जमना अओ असा कि ए अपु तेन्के ईज्जत कदर ना  
कते।

नोउअ जमाना आ, किस कि दुगुणु कमुन्ते, पर सुआ तलाक देंते।

सुआ अब्बल घर त असे, पर टब्बरा सोब छांग.छीठी भुन्ते गओ असे।

आजकल सोबी मेहणु के गलेज बठ त सुआ समान भुंता,

जदकी सोबी के धनवाड़ शुने असे।

इ सोब बोके जी तुस कम्प्युटर पुठ फोटो ई हेरण लगो असे।

तुस इस फोटो बदल सकते।

या त यक डिलीट बटण चीकी कइ एस खतम कइ सकतें।

लेखक: विनोद कुमार

तुबारि पत्रिके अन्तर छपो सोबी लेख, त कथा अन्तर भुओ विचार सिर्फ  
लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ  
भाषा सुहलियत करण जे यक मंच देण लगो असी।



बीनी: ओई लिया! ई कांड छते बणातां ना? धीक माते छत त बणताथ।  
 नाई: जनाब जी, मोडं के कर्गेई नेई  
 बीनी: ही त तोड के कर्गेई थी  
 नाई: थी जी..... पर तेसे चोउर पांज दल निस गे।  
 बीनी: त कि भु? चोउर पांज दल निसे त कर्गेई अन्तर त सुआ दल भुंते।  
 नाई: पर में कर्गेई अन्तर त यके ई दल असा।




## शाम सिंहे कोशिश

राजा शाम सिंह अपु मन्त्री जोई रेजुएणी बग रडकण जे गा  
 महाराजा: हाउ बेए...! तोता में ध्यान घड़ी घड़ी अपु कना जे करण लगो असा  
 मन्त्री: जी तुसी सचु बोलु।  
 महाराजा: एस तोते ट्वाते त एस पकाणते  
 मन्त्री: जी महाराज। अउं एस एभेई टाई कइ पकाणता।  
 महाराजा: मन्त्रीए में बोलणे मथबल ई नेओथ। अउं एसे ई अम्मर अन्तर उडरुं चहांता।  
 मन्त्री: महाराज सेमोड़ी कइ।  
 महाराजा: मन्त्री जी अउं बी एसे ई उडरु चहांता। तु दोड़ी कुछ तयारी कर।  
 मन्त्री: ठीक असु जी, अउं कोशिश कता।  
 महाराजा: मिस्त्री घोड़ा बणाण ला।  
 मन्त्री: हां जी, घोड़े पखोण बी लाई दुतो असे।  
 अब घोड़ा उडार देण जे तयार असा।  
 महाराजा: ए त ती अब्बल असा।  
 राजे उछीड़ कइ घोड़े बठ टाउ दता।  
 महाराजा: अब कि करुं ?  
 मन्त्री: महाराज जी घोड़े सुमल कनेरी कन थुसी दिए। तोउं घोड़ा उडरता।  
 महाराजा: हा हा..... अब त ए उडरुं लगा। पर.....  
 पर अउं घोड़े उमले कन भी पोउणे चाबी छंण भुल गओ असा।



## अन्हा घोड़ा



यक ग्रांए बिचो-बच घोड़ी जे यक गुआड़ बाणो थी। तेथ अंतर दुई घोड़े बिशतेथ।  
 दूर कियां से दुहो यके रंगे केतेथ। भेएइ घेई कइ पता लगताथ की यक घोड़ा अन्हा  
 थिआ। तेस काणा भुण किया पता तेसे मालिखे तेसे टेल पाणी कताथ। तुस होर तेस  
 घोड़े धे हेरे त मालिखे तेसे किएड़ी बड़ घंटा लाओ असी। त जे काणा घोड़ा असा से  
 होर तेस घोड़े घंटाई अवाज शुंण कइ तेसे भेएइ पुजताथ। तेसे पतोति तेस गुआड़  
 अंतर हांटताथ। होरा से घोड़ा बि तेसे मदद कताथ। किस कि से ई हेरता रहेंताथ कि  
 होरा से घोड़ा बि तेसे पतोति अओ असा ना कि नेई आओ। से ई चहांताथ कि तेसे मित्र अपु सुसुर जगाहि पुजो  
 असा ना से तसे कियां बाद होर जगाई जे घेंताथ।

शुणे लियो! तेस गुआड़ी मालिखे ई भगवान असी तोउ छड़ ना देंता कि असी अंतर कोई दोष त कमी ना  
 लौती। से हमेशा खयाल रखता कि असी जेखेई बी जरूरत भुंती, से केसे ना केसे हैं मदद करण जे जेरुर लंघाता।  
 कपले कपले अस तेस अन्हे घोड़े ई भुंते, जे भगवाने बेलि बन्हो घंटाई बेलि हैं परशानी दूर कता। त कपले अस  
 अपु किएड़ी जोई घंटाई बड़ होरी सुसुर बत हरावते।



## ब्याह अन्तर लेहर त अणबण

यक धाणि त जुएली लेहर एण कोई अजब बोक नेई। असी सोबी केस ना केस बोकी पुठ जरूर लेहर एन्ती। पर परेशानी ई असी कि सोबी एहसास केआं ज्यादी गलतफैमी 'लेहर' अन्तर असी। एस बझई जोई लेहर सुआ नुकसान कती त हैं रिश्ता बिगाड़ छती, किस कि सुआ जेई ई नेई शिचो कि कीं कइ लेहर किढ़ण त कीं कइ होरी के लेहर शान्त करिण। जपल कोई लेहर किढ़ता त अस तस अपफ पुठ नेन्ते जेसे बेलि अस होरी के बोक शुणुण जे तेयारीन्ते ई नोउ, बल्कि अपु बचाव करण लगते।



त जपल अउं लेहरिन्ता, तपल पेहले मोउं मानुण असु कि में लेहर अपु साथी बारे नेई, बल्कि ए में अपु बारे असी। मतलब कि में लेहर में व्यक्तित्व त में समझे बारे असी। जीं कि अगर अउं समझता कि झूठ बोलुण ठीक असु, त में साथी जेतु बि झूठ बोलियेल तोउं बि मोउं लेहर ना एन्ती। पर अगर मोउं झूठ बोलुण खरु ना लगतु, त झूठ शुण कइ अउं लेहरीन्ता। त में लेहर किढ़ण अपु साथी पुठ ना, बल्कि झूठे बारे में समझ पुठ भुन्ति। जपल अउं एस मानता त अउं ई ठीक कइ सकता कि कीं कइ अपु साथी पुठ मोउं अपु लेहर किढ़ण? बणाणे मकसद अन्तर या बिगाड़णे मकसद अन्तर।

तिहांणि में साथी जपल में किओ कुछ कम पुठ लेहरिन्ती त मोउं ई ना समझुण कि से मोउं पुठ लेहरीण लगो असी, बल्कि मेई जे कम किओ असु तेस पुठ लगो असी। जीं कि जपल अउं चरे गी पुजता, त में जुएली मोउं पुठ लेहर किढ़ती। तसे लेहर मोउं पुठ ना, बल्कि में चरे भुण पुठ भुन्ति। किस कि शयद गी में कोई जरूरत भोल, या शयद तस डर लगो भोल कि राति मोउं कुछ भु त नोउ। त तिखेई अउं तसे लेहर अपफ पुठ ना नी कइ अगर अपु कम पुठ रखता त अउं तस समझ सकता। ई सोच रखणे बेलि अउं तसे बोक धीरज जोई शुण सकता, त हैं बुछ अणबण ना भुन्ति।



**कतो खरे असे से मेहणु** जे दुष्टी के सलाह पुठ ना हंठते,

होर ना पापी मेहणु जुएई खड़ीता त ना बुराई करणेबाड़ी जुएई किठींते!

पर से त परमेश्वरे वचन जुएई खुश रेहंते, त दन-रात तसे बोकी पुठ ध्यान कते रेहंते।

से तेस बुटे ई असे, जे चलते दरियोए ओत लओ असा त जे अपु रत एणे टेम फलता, त जेसे पन्ने कदि ना शुकते।


तोउं त जे कुछ से मेहणु करियेल से कामियाब भोई घेन्तु।

दुष्ट मेहणु ई ना भुन्ते, से तेस केउए ई भुन्ते, जे बियेरी बेलिए उडीर घेन्ते।

एस बझई जुएई दुष्ट मेहणु परमेश्वरे अदालत अन्तर टिग ना सकते, होर ना पापी धर्मी मेहणु के हुसड़े अन्तर टिगते।



किस कि परमेश्वर धर्मी मेहणु खरी बत हंटांन्ता, पर दुष्टी के बत बरबादी कना जे घेन्ती।



## धिरुभाई अम्बानी 28

दिसेम्बर 1932 अन्तर यक मोध टब्बर अन्तर जम्मो थिआ, जे छोरवाड़, जुनागढ़ जिले अन्तर बिश्तेथ। तसे बोउए नोउ हीराचन्द त ईये नोउ जमनाबेन थिउ। तसे बोउ यक स्कूल अन्तर दिहाड़ी माष्टर थिआ। तसे दुई भेण त दुई भाई थिए। धिरुभाई बिझामी कुआ थिआ।

जपल धिरुभाई दशमी ईम्तिहान दी गा, त तसे बोउ, जे कुछ टेम केआं बिमार थिआ, तस अपु भेएड भिआई कइ बोलु, “कोया, तोउ पता असा कि एचेल अउं बिमार रेहन्ता त ततु कमाई ना बटता। मोउं ई पता असा कि तुं हउ बि पढुण चहन्ता। पर अब मोउं केआं ना पुगती। अउं चहन्ता कि तुं पढाई छड दी कइ कुछ कमाण दे, किस कि टब्बरे तें कमाई जरूरत असी। तें बड़े भाई रामनिक तोउ जे एक कम हेरो असु, छने गा त कमाण दे।” विचारा धिरुभाई अपु बोउ जे किछ बोल ना बटु। सिर्फ अतुरु बोलु, “बोउअ, जी तुस चहन्ते, अउं तिहांणि कता।” तोउं से येमेन देशे, आडेन नोउए यक शेहर जे गा। तठि से ए. बेसी एंड कॉ (A. Besse & Co.) नोउए यक कम्पानी अन्तर पिओने कम करण लगा। एस कम्पानी अन्तर कम कतेकुते तेन अलग अलग देशे सामान खरिदुण (Purchase), बेचेण (Sells), बांटण (Distribution), रुपेई बटाण (Currency Trading) त रुपेई खर्चण (Finance Management) बगैरा बगैरा कम शिचु। धिरुभाई अन्तर आत्मसुधार करणे यक गजब इच्छा थी। से ब्यादि चरे तकर अंग्रेजी व्याकरण पढुण, त होरे होरे चीजे बारे लिखुण बिश्ताथ। सुआ किताब बि पढताथ। अंग्रेजी, हिन्दी त गुजुराति अखबार तीं पढताथ। तस पता लग गो थिआ कि खरा कारोबार करुण जे बोक करणे तरीका त सुसुर भाषा बोलुण कतु जरूरी असु।

पता जपल तस अपु कारोबार करण जे रुपेई के जरूरत भुई त तेन अडेन शेहरे छोटे छोटे दुकानदारी जे बोलु, “फायदा भोल त सोबी के, घाटा भोल त सिर्फ में”।

## तुबारि मासिक पत्रिका

- ◆अस इ उम्मिद करुं लगो असे कि एण बाडे रोज अन्तर सुआ मेहणु इस कम अन्तर साथोट देन्ते।
- ◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पदुं जे त भाषाई सुहलियत करण जे इ पत्रिका शुरु किओ असी।
- ◆तुबारि यक अवाणिज्यिक पत्रिका भो।
- ◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगो। अगर कोई ई सोचता बि त अस जिम्मेबार नेई।
- ◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ◆आर्टिकल्स ना मिलए, या घाटि मेहणु के साथोट ना मिलए त तुबारि पत्रिका कदी बि बंद भुई सकती।
- ◆कोई चीज छपां असी या नेई छपां जे तुबारि संपादकीय टीमे पुरा अधिकार असा।
- ◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव ओर आर्टिकल्स रखुं जे सुविधा किओ असी।
- ◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

### तुबारि संपादकीय टीम

- ☎ 9418429574
- ☎ 9418329200
- ☎ 9418411199
- ☎ 9418904168
- ☎ 9459828290



एस बोकी पुठ तुस सोच सकते कि तस अपफ पुठ कतु यकीन थिआ। जपल तस इलाण्ड या भारत देश अन्तर बिशणे ठीक करिण थी त तेन अपु भारत देश अन्तर बिशणे ठीक किआ। तेन कोकिलाबेन जोई ब्याह किआ त तसे दुई कुआ जम्मे, जेन्के बारे तुसी जरूर शुणो भोल। यक नोउ मुकेश आम्बानी त होरे नउ अनिल आम्बानी असु। तेन रिलायानस इण्डोस्ट्रीज (Reliance Industries) नोउए यक कंपानी बणाई, जे अब यक सुआ बोडा कंपानी बण गो असी।

धिरुभाई अंबानी बोताथ “बोडी सोच, झट सोच त होरी केआं अगर सोच। किस कि सोच (Idea) पुठ केसेरी मालिकाना हक नेई।”